



Na Elder Bruce A. Carlson

No te Hitu Ahuru

Ia faaue ana'e te Fatu

Mai te mea e, e haapa'o tatou ma te faaroo, noa'tu te huru o te aano te ohipa, e hopoi mai te reira i te arata'iraa, te tautururaa e te hau a te Fatu.

Te vai ra te hoê aamu no na taata e piti, e mea au roa na raua ia haere e orihaere, ua tarahu raua i te hoê manureva no te uru aihere no te haere i te hoê roto atea roa no ta raua ohipa tai'araa i matarohia i te mau matahiti atoa. I muri a'e i te hoê tere maitai roa, ua ho'i mai te pareti e tii ia raua. Tera râ, ua faaraa oioi oia i na taata tai'a e, eita e maraa i to'na manureva ia rave ia raua, ta raua mau tauhaa e te kilo hau o te i'a tei roaa ia raua. E titauhia e piti a'e tere.

I teie nei, aita teie na taata tai'a e hinaaro e aufau e piti a'e tere manureva. No reira, ua fafau raua e, e puohu maitai raua i ta raua mau tauhaa e e aufau atoa i te tahi « bonus » ; ua farii au ore noa te pareti ia tamata i te faareva.

Ua ataata noa na taata tai'a a tura'i ai te pareti i te manureva ia rere. Tera râ, tau tetoni i muri mai, ua hee te manureva e ua topa i te hoê vahii papepape i te hopea roa o te roto.

Ua hee te manureva i te taime a rere ai oia i rapae i te mea mataro-maitahia tei parauhia te 'effet de sol'. Ia paari ana'e te mata'i i ropu i te fenua e te pererau o te manureva, na te reira e tura'i i te manureva i ni'a – mai te mea e, e mea piri â te manureva i te fenua. I teie râ taime, a maraa maru noa ai te

manureva no te uru aihee i rapae i te 'effet de sol' ua titauhia ia'na ia mau na roto i to'na iho puai, aita râ i ti'ahia te reira.

Aua'e râ aita e pepe ino roa, e ia hau a'e ra ratou paatoa, ani atu ra te tahi taata tai'a i te tahi, « Eaha te ohipa i tupu ? » Pahono maira te tahi e ; « ua perehi tatou i te taime haamaueraa – te tahi tau hanere metera (91 metera) i te atea i te vahii i topa ai tatou i te matahiti i ma'iri a'e nei ! »

Mai teie na taata tai'a, i te tahi taime te ti'aturi nei tatou e, te vai ra te tahi rave'a ohie a'e, te hoê haapotora, e aore râ, te hoê tauiraa i te mau faaueraa a te Fatu ia tano te reira i ni'a i to tatou hinaaro. I roto i teie huru mana'o, te mo'ehia ra ia tatou e, ia haapa'o maite-ana'e-hia te mau ture a te Atua, e hopoi mai te reira i Ta'na mau haamaitairaa e te oreraa e haapa'o i Ta'na mau ture ra, e arata'i ia te reira ia tatou i te mau hopearaa i faataahia.

I te taime a pihia ai oia ei peresideni no te Ekalesia, ua parau o Harold B. Lee e : « Te paruru o te Ekalesia tei roto ia i te haapa'oraa te mau melo i te mau faaueraa... Mai te mea e, e haapa'o ratou i te mau faaueraa, e tae mai te mau haamaitairaa ». ¹

Te tumu rahi e ma'iti ai tatou ia haapa'o ore i te hoê faaueraa no te mea ia

e (1) ua haapapû tatou ia tatou iho e, e ere te reira faaueraa no tatou ; (2) aita tatou e ti'aturi nei e, e mea faufaa ; e aore râ, (3) e ua papû ia matou e, e mea fifi no te haapa'o.

1. E ere teie faaueraa no'u

I roto i te mau matahiti hopea o te faatereraa a te arii Solomona, ua faaraa maira te Fatu ia'na na roto i Ta'na peropheta e... « E hopoi-ê-hia e au teie nei basileia, e ua hopoi au no to oe iho tavini ». ²

Aita i maoro i muri iho ua itehia i te peropheta Ahia taua tavini ra, o Ieroboama, e taata « itoitoe », ta Solomona i faairi « ei ni'a i te tao'a aufau o taua utuafare o Iosepha ra ». ³ I roto i ta'na ohipa, ua titauhia ia Ieroboama ia ratere mai te mou'a ra o Epheraima, i reira oia e noho ai, haere roa'tu i te oire pû o Ierusalem. I roto i te hoê o taua mau tere ra, ua farerei o Ahia ia'na i ni'a i te purumu. Na roto ia Ahia ua parau a'e ra te Fatu e, « e tuuhia'tu e au na opû hoê ahuru ia oe ». ⁴ Ua haapii atoa'tu oia ia Ieroboama e, « mai te mea e, e haapa'o oe i ta'u ra haere'a,... i te haapa'oraa i ta'u nei mau peu e ta'u nei parau,... ei piha'i-atoa-iho vau ia oe,... e horo'a hoi ia Iseraela ia oe ». ⁵

Ia faaroo a'e ra Solomona i te parau tohu a Ahia, ua imi a'e ra oia i te rave'a ia haapohe ia Ieroboama, no reira, ua reva'tura o Ieroboama i Aiphiti. ⁶ Ia pohe a'e ra o Solomona ua ho'i maira o Ieroboama mai Aiphiti ra haere atu ra i te pae apatoerau o Iseraela e ua haamata ihora i te faatere i na opû hoê ahuru i te pae apatoerau. ⁷

Tera râ, i roto i te opuaraa a Ieroboama no te faatere i te basileia, ua ano'i oia i te maitai e te ino. Ua faati'a a'e ra oia ia Sekema ei oire pû no te nunaa, e oire faufaa rahi i te pae faaroo no to'na ra mau taata. Te vahii pe'ape'a râ, ua tuu atoa oia i te mau peu satane i roto i ta ratou mau haamoriraa. ⁸

Ua parau o Ieroboama ia'na iho e, eita te tahi mau faaueraa a te Atua e tano no'na. Ei hopearaa no ta'na mau ohipa, ua taparahi pohehia to'na mau huaai taatoa, e no te mau peu iino ta'na i tuu i roto i ta ratou mau oro'a mo'a ra, ua tiahi-ê-hia na opû hoê ahuru o

Iseraela i rapae i to ratou fenua ai'a.⁹

Mai te hoê manureva e ma'ue i rapae i te 'effet de sol' e ua hau to'na teimaha i te teimaha e maraa i to'na mau pererau ia amo, oia atoa ia to tatou huru ma'itiiti i te mau ture a te Atua, eita atoa ia te reira huru e hopoi mai ia tatou nei i te taatoaraa o te mau haamaitairaa o te haapa'o.

2. E ere teie faaueraa i te mea faufaa

E rave rahi matahiti i muri mai, o Naamana, e aito tama'i no Siria, « e taa-rahi oia i to'na ra fatu »¹⁰ tei tere mai to'na fenua ai'a haere atu i Ieseraela ra e ua ani atu ra i te arii Ieroboama, ia faaora ia'na i te ma'i lepera.¹¹

Ua tonohia'tura o Naamana i te peropheta ra ia Elisaia. « E ua tono maira Elisaia i te ve'a ia'na, na ô maira, a haere a hopu, e ia hitu hopuraa i Ioridana, ... e mâ oe i reira ».¹²

Noa'tu teie fafauaraa na te hoê peropheta ia ora, ua inoino o Naamana i ore o Elisaia i haere mai e farii tino roa ia'na, e hau roa'tu ho'i to'na inoino i parau mai te peropheta ia'na ia haere e hopu e hitu taime i roto i te anavai na'ina'i e te reporepo o Ioridana ra. Ua titau to'na te'ote'o i te hoê mea hau atu i te faahiahia e te rahi, hoê mea i aifaito i to'na ti'araa e to'na parahiraa i roto i te oire e i te nunaa.

Aua'e râ no Naamana, ua paraparau to'na tavini ia'na e, noa'tu te mea ta te peropheta e ani ia'na ia rave, mai te mea e faaroo oia, e hopoi mai te reira i te mau haamaitairaa a te Fatu. Ua haere o Naamana e hopu ia'na i roto i te anavai Ioridana mai tei haapiihia mai ra e ei hopearaa no to'na haapa'o, ua ora oia i to'na lepera.¹³

Mai te mea e haapa'o tatou i te mau faaueraa a te Fatu, noa'tu e, te mana'o ra tatou e, e ere i te mea faufaa rahi te reira mau faaueraa, e farii mau tatou i te mau haamaitairaa Tà'na i fafau mai.

3. E mea teimaha roa teie faaueraa

I muri a'e i te faueraa a te Fatu ua arata'i te peropheta Lehi i to'na utuafare i roto i te medebara. I roto i te mau mahana matamua o te tere, ua faaue atu ra o Lehi i ta'na tamaiti o Lemuela, ia « etaeta, e te aueue ore i te haapa'oraa i te mau faaue a te Fatu ra ! »¹⁴



Ia tae mai râ te faueraa mai roto mai i te peropheta ia ho'i faahou i Ierusalem no te rave mai i te mau api veo tei roto i reira « te papaa parau no te Ati Iuda »,¹⁵ ua pato'i a'e ra na tamaroa paari, i te na oraa e, « e mea rave taiatâ ».¹⁶

Noa'tu te amuamu a to'na na tuana, na roto i te faaroo e te haapa'o o Nephi i te mau faaue a te Fatu ua roaa mai taua mau api veo ra. Ua ti'a te hoê nunaa, ua ora te hoê reo e ua haapiihia te evanelia a Iesu Mesia i te mau u'i e rave rahi.

I te tahi taime e parau paha tatou e, e taa mai te Fatu i to tatou haapa'o ore no te mea, no to tatou huru taa ê, e ere i te mea ohie no tatou ia haapa'o i Tà'na mau ture, e mea huru haama e aore râ, e mea mauui. Tera râ, mai te mea e, e haapa'o tatou ma te faaroo, noa'tu te huru o te aano te ohipa, e hopoi mai te reira i te arata'iraa, te tau-tururaa e te hau a te Fatu.

E piti taime to te peropheta Iosepha Semita aniraa i te Fatu e, e ti'a anei i te

hoê hoa faufaa roa, o Martin Harris, e rave i na 116 api matamua papa'i-rimaha o te mau parau i iritihia no roto mai i te « buka a Lehi », no te afa'i mai Harmony haere atu i Palmyra. E piti taime to te Fatu a'oraa ia Iosepha eiaha e horo'a i te reira mau parau ia Harris tane ra.

Te imi ra o Martin i te rave'a ia faaohipa i te mau parau i iritihia no te tapu i te mau parau haavare e puharahia ra e to'na mau hoa no ni'a i to'na auhoaraa e o Iosepha Semita. I te toru o te aniraa, ua farii te Fatu i te aniraa a Iosepha.¹⁷

Ua mo'e te reira mau parau ia Martin, e no reira, ua iriti-ê-hia te reira mau api i te rima o Iosepha Semita no te tahi tau. Ua riro te reira ei haapiiraa mauui no te peropheta Iosepha tei parau e, « ua faa'iro vau i teie ei ture na'u : *Ia faaue te Fatu, a rave* ». ¹⁸ E nehe-nehe atoa teie ia riro ei ture na tatou.

E mea papû maitai te pahonora a te Fatu ia haapa'o ana'e tatou i Tà'na mau faueraa. Ua fafau mai Oia ia

tatou e, « mai te mea e haapa'o oe i ta'u mau faaueraa e e itoitonoa e tae noa'tu i te hopea e noaa ia ia oe te ora mure ore ». ¹⁹

Ua a'o atoa mai Oia ia tatou e, « o vau, o te Fatu, e aroha to'u e te here nei ho'i au ia ratou o te mata'u mai ia'u nei, e e mea au na'u te faatura ia ratou o te tavini mai ia'u mai te parau-ti'a e te parau mau ho'i e tae noa'tu i te hopea ». ²⁰

Ia haapa'o tatou i te mau faaueraa a te Fatu e horo'a mai te reira ia tatou i te ti'aturi i roto i te e'a ta tatou i ma'iti, e faati'a ho'i te reira ia tatou ia farii i Ta'na arata'iraa e ta'na haapiiraa a tautoo tamau noa ai tatou, e e horo'a mai ho'i i te puai ia riro tatou mai te Faora, o Iesu Mesia, e ia ho'i i mua i te aro o to tatou Metua.

Ta'u pure maori ra, ia rohi tatou i te mau mahana atoa ia rahi atu to tatou haapa'o i te mau ture, te mau oro'a e te mau faaueraa o te evanelia a Iesu Mesia ia ti'a Ia'na ia haamaitai hope atu a i to tatou oraraa.

Te faaite papu nei au e, ia haapa'o tatou i te mau faaueraa a te Atua, e horo'a mai te reira i te mau haamaitairaa no te ra'i, te ora nei to tatou Metua i te Ao ra e Ta'na Tamaiti o Iesu Mesia; te Buka a Moromona o te parau ia a te Atua ; e te peresideni Thomas S. Monson e peropheta ia na te Fatu no to tatou anotau, na roto i te i'oa o Iesu Mesia ra, amene. ■

TE MAU NOTA

1. Harold B. Lee, faahitihia i roto i te Stephen W. Gibson, « Presidency Meets the Press », *Church News*, 15 no tiurai 1972, 3.
2. 1 Mau Arii 11:11.
3. 1 Mau Arii 11:28.
4. 1 Mau Arii 11:31.
5. 1 Mau Arii 11: 38.
6. Hi'o 1 Mau Arii 11:40.
7. Hi'o 1 Mau Arii 12:2-3, 20.
8. Hi'o 1 Mau Arii 12:25-30.
9. Hi'o 1 Mau Arii 14:10, 15-16.
10. 2 Mau Arii 5:1.
11. Hi'o 2 Mau Arii 5:5-6.
12. 2 Mau Arii 5:10.
13. Hi'o 2 Mau Arii 5:11-14.
14. 1 Nephi 2:10.
15. 1 Nephi 3:3.
16. 1 Nephi 3:5.
17. Hi'o *History of the Church*, 1:20-21 ; Te Parau Haapiiraa e te Mau Parau Fafau 3; 10.
18. Te mau Haapiiraa a te mau Peresideni o te Ekalesia : *Iosepha Semita* (2007), 160.
19. Te Parau Haapiiraa e te Mau Parau Fafau 14:7.
20. Te Parau Haapiiraa e te Mau Parau Fafau 76:5 ; faahauhia te faatomaraa.



Na Elder David A. Bednar

No te Pupu no te Tino Ahuru Ma Piti Aposetolo

E ma te ara-tamau-maite-raa i te reira

E nebenebe te rave'a faaararaa pae varua... e tauturu i te mau metua o Ziona ia hi'o e ia ite papu no ta ratou mau tamarii.

A ita i maoro a'e nei, te faahoro ra vau i to'u pereoo a haamata ai te topatapata te vero i ni'a i te hi'o. I te tahi a'e pae o te puromu, te ho'e tapa'o uira e faaite ra i te parau faaara : « E pape i mua ». Te puromu o ta'u e tere ra e au ra e mea fifi-ore. Area ra, na teie faaararaa faufaa rahi i vaiiho ia'u ia faaineine no te ho'e ati mau o ta'u i ore i mana'o e i ore i ite mata atu ra. E a tamau noa'i au i to'u tere i te vahi i faataahia, ua tamaru vau i to'u pereoo ma te hi'o haere i te tahi atu mau tapa'o ati.

E mea papu te mau tapa'o faaite i roto e rave rahi hiro'a o to tatou nei oraraa. Mai teie te huru, te ho'e fiva o te tapa'o matamua ia no te ho'e ma'i. Vetahi faaiteraa no te pae o te ihiihi [economie] e te ohipa e faaohipahia'i no te iteraa i te anotau amuri no te huru i roto i te fenua e no te huru ihiihi tupuna. Tei te huru o te area o te ao o ta tatou e ora nei, e farii tatou i te pape pu'e, te ho'e heeraa fenua, te mata'i rorofa'i, te tsunami, te mata'i puahiohio e aore ra, te mau tapa'o faaite no te vero to'eto'e.

E haamaitahia'toa tatou e e faaara pae varuahia e te mau tapa'o faaararaa

ei tumu no te parururaa e te faatereraa i roto i to tatou oraraa. A haamana'o na ia Noa i te faaite-raa-hia e te Atua i te mau mea aita a i hi'ohia, e « i tarai ai i te [pahi] ia ora to'na fetii » (Hebera 11:7).

Ua faaarahaia Lehi ia faaru'e i te fenua o Ierusalem e ia rave i to'na utua-fare e ia haere atu i roto i te medebara no te mea te mau taata o ta'na i poro i te tatarahapa te hinaaro ra i te haapohe ia'na (hi'o 1 Nephi 2:1-2).

Ua faahereherehia te Faaora Iho na roto i te faaararaa a te ho'e melahi. « Inaha, ua faa maira te ho'e melahi a te Fatu faaheitaoto maira ia Iosepha na o maira, a ti'a a rave i te tamaiti iti e ta'na metua vahine, a maue i Aiphiti, ei reira

